

德壯果公年譜

德壯果公年譜卷七

次孫花沙納恭纂

嘉慶二年丁巳

七月十四日

公偕明亮奏言巫山賊衆經官兵剿敗之後退屯官坪鋪

一帶

臣

率兵追擊該匪等向三溪河等處奔逃官兵隨剿

隨進沿途截殺五百餘名生擒龔文炳等一百八十二名

飭委道員陳蘭森等隔別嚴訊據供該匪等自上月攻撲

雲陽縣城被官兵殺傷甚多一股被官兵衝殺已奔往大

甯縣一股到夔州巫山想攻城池不得齊王氏姚之富等

商量逃過界嶺若搶占巴東歸州可以與芭葉山同教會
合再作計議等語臣等查賊匪指東竄西似難深信復加
哨探賊匪竟向界嶺一帶竄逃該處與湖北巴東歸州相
聯道路叢歧東北界連襄鄖東南近接荆宜各郡亟須設
法趕赴賊前相機攔截當留參將吉林泰都司徐朝綱帶
兵八百餘名在巫山防護縣城臣等聲言由陸路追勦一
面調集南岸現有船隻於初三日黎明帶兵順江而下初
四日辰刻趕到巴東詢知賊人在巴東北岸之平陽上壩
下壩一帶屯聚距縣治皆在百里外當將各渡口卡座酌
量增減并獎賞出力鄉勇察看民情尙屬安帖因思歸州

本無城垣且在江北較巴東情形更急當飭鎮臣木騰額

等帶兵一千名留守巴東並將防堵事宜飭令妥辦臣等

卽於初四日亥刻趕到歸州該州經汪新派遊擊俞國智

帶兵二百名防守但兵數尙單客民百姓因賊匪已至巴

歸交界之龔家橋地方俱已紛紛逃避臣等連夜於州治

北面山梁分兵設卡民心鎮定隨查龔家橋係入歸州要

隘現據差派各路探報巴東北岸口門等處均有賊散處

直至龔家橋人數甚衆幸臣等繞出賊前易於迎擊自不

至與額爾登保勦辦之賊會合初五日派令巴圖魯侍衛

溫春富僧德總兵達音泰副將德甯遊擊馬瑜等前往迎

探至土地嶺地方遇騎馬探信賊目二十七人該侍衛等
飛卽趕上殲斃多名臣等現於龔家橋之東紅土巖紮營
其界連歸州之興山房縣以及竹山竹谿等處山僻徑幽
難保無藏匿餘匪臣等兩次扎致汪新分飭各屬添撥兵
勇嚴密堵禦臣等惟有上緊勦辦總期賊匪不致散竄早
就駢誅至川省竄屯各路之賊及新起匪衆大甯一路有
惠齡恆瑞慶成富成等帶兵由黑樓門紅巖青莊坪等處
進剿又有劉君輔馬瑀及參將胡尙賢各帶兵分堵其萬
縣開縣交界處所有新起賊人屯聚羅家巖陳家山一帶
臣等於所帶兵內抽出四千五百餘名交穆克登阿副將

王承勳會同舒亮勦辦雲陽縣城飭遊擊李芝榮等帶兵
五百餘名駐守萬縣城飭總兵艾如文帶兵一千二百餘
名駐守開縣城令都統巴克坦布訥音帶兵八百餘名駐
守夔州府城令總兵德齡副將富明阿帶兵一千餘名駐
守其餘如開縣之臨江市雲陽之雲安城夔州之白帝城
巫山之高唐觀梁山之黑天池東鄉之普光寺新甯之聖
登寺等處或防堵奔竄之賊或查辦蠢動之匪或搜捕餘
孽俱經宜縣與臣相商逐漸安設官兵共計二萬有餘自
可以次肅清正在繕摺間又聞一股賊匪至巴東縣對岸
之石門牛口大葉等處焚掠居民渡江避徙該縣飛稟告

急當派鎮

臣

達音泰先領兵千餘由水路星往

臣

等酌留

弁兵固守歸州將所餘官兵刻卽由陸路帶領至石門一帶勦洗惟現聞興山保康房縣地方尙有伏而未起賊匪惟有儘此兵力先將歸巴一帶現有賊匪趕緊擒掃再將奔竄各匪以次勦辦

諭曰此次明亮等拏獲賊匪訊出齊王氏姚之富等欲往歸州巴東與長陽賊匪合夥明亮等現在繞出賊前相機迎擊若能乘此機會將該二犯先行擒獲則餘黨自必瓦解著汪新酌帶兵勇迅往緊要處幫同堵拏其界連歸州之竹山竹谿等業經明亮等派令臬司先福等前往汪新亦當飭屬添兵嚴堵勿使勾

結至開萬雲陽新起之賊業經宜縣派員分投兜捕此時明亮
德楞泰前往堵剿自不致與前起之賊合夥即使歸併一處更
可聚而殲洗現在阿哈保所帶頭起盛京吉林官兵五十餘員
名已諭令迅速行走其惠倫所帶後起黑龍江兵均著趕赴明
亮一路協剿明亮等務當將歸巴一帶趕緊剿淨

十六日

公偕宜縣明亮惠齡奏言

臣

等督同官兵剿辦開縣一帶

新起賊匪閏六月二十二日穆克登阿由萬縣進攻行抵
高坪山地方拏獲奸細王泳澄等五名訊知賊衆屯聚白
陽灣一帶當經該提督率同參將姜敏功等於二十三日

分隊攻擊高陽壩白楊灣石灰槽董家營等處賊卡我兵奮勇撲壓匪衆相持兩時之久力不能支陸續奔回我兵儘力追趕殲斃二三百名生擒四十四名內有唐泳富鍾開景吳漢義等三名訊係賊目據供此股賊匪係林亮功爲首餘無要供卽行正法其水田壩白巖山一帶之賊亦經舒亮督兵勦殺一百餘名各處賊匪俱竄至雲陽開縣交界之筆架山鹿頭山燕子山一帶分股盤踞該處山形險峻袤延三十餘里舒亮帶兵進至韓彭坳穆克登阿占據尖梁山正在訂期夾攻二十五日有賊匪二三千人直撲穆克登阿營卡副將王承勳帶領兵勇奮力勦擊賊匪

暫退午後復率六七千人分作五路前來穆克登阿率同
姜敏功等分投截殺並經臣宜縣派令總兵索費英阿等
帶兵趕赴援剿賊匪始紛紛敗逃約計殺賊五六百人匪
衆奔回燕子山等處屯據竊思新起賊匪俱在開萬雲陽
境內滋擾其大江南岸之石碛廳地方路通湖北施南一
帶該處並無防兵當卽派令烏什哈達帶兵一千名馳往
添募鄉勇扼要據守至川楚竄匪逃至馬鞍山七星壩分
赴蓮花山象鼻子九盤子白水池龍潭乾溪口等處焚掠
臣明亮德楞泰於二十日趕到夔州府親率巴圖魯侍衛
鎮將等分投迎擊副將長春遊擊劉維馨伯明宋浩修都

司應元寬守備馬金瑞何君佐等奮勇直前殺斃賊匪二百餘人生擒黃福基等二十六名匪衆仍退七星壩馬鞍山一帶屯聚當提獲犯審訊據供賊匪以夔州爲蜀省水陸門戶希圖占據現在商議欲暗分一股由山後溝內小道潛繞郡城正東先占白帝城一帶窺伺郡城等語查白帝城下關城一帶下臨瞿塘峽口實爲水陸扼要臣明亮德楞泰當於柳家灣卧龍岡拏卡以護郡城並飛飭總兵達音泰侍衛溫春等馳赴白帝城等處分拏卡座二十二日早果有騎馬賊匪三百餘人由草堂河蜂擁而來搶上白帝城山梁直撲營卡官兵用槍礮轟擊忽於火風埒巖

洞內擁出伏賊四五百人各路衝突官兵奮力下壓賊匪潰敗退屯草堂河一帶至三更時匪衆分然火炬勇猛直前計圖兜裹官兵經達音泰溫春等督率兵勇排列山梁槍擊箭射斃賊三四百人臣明亮德楞泰帶兵趕往賊始敗逃次日巳刻復有賊衆分爲三隊前來勢甚兇猛當率巴圖魯鎮將等奮勇堵剿槍箭所及賊人均執木板抵護連用礮擊賊人不能抵敵官兵乘勢壓下短兵相接殺斃四五百名餘賊合併一處復撲白帝城營卡我兵人人切齒將賊匪前隊五百餘名兜圍殲戮生擒韋五等一百三十名時已薄暮後隊賊匪三千餘人是夜復然火炬作撲

卡之勢

臣

等鼓勵兵勇輪番更進至四更時陡然壓下殲

斃醜類甚多匪衆捨命狂奔跌傷觸石死者不下二三百

人此次陣亡千總包成功把總謝天保兵勇亦間有受傷

計自二十二日起官兵剿殺賊匪一千四五百名始將白

帝城一帶保護惟查夔州下接巫山大甯路經叢雜難保

無乘間潛竄之賊必須趕緊攔截且大甯地方因有老木

園之賊牽制縣城防兵既單巫山又有新起之賊冀圖響

應當派達音泰等先後趕赴巫山堵剿參將胡尙賢帶兵

馳往大甯縣城防守維時

臣

惠齡同恆瑞慶成柯藩等由

雙河口洞里壩一帶進剿賊匪該處有山澗一道因值山

水陡發隨營糧員州判印萬全立督夫役搶搭浮橋猝被淹斃二十三日臣惠齡等行至五里峽地方探有賊匪三四百人暗伏深林密箐之內我兵奮勇搜剿生擒宋長達等三十四人餘俱殲戮殆盡適聞賊匪攻撲白帝城隨督兵趕赴夔州興肇亦卽繼至正擬分投帶兵前進又接觀成知會奉節大甯連界之甌子溝突有新起賊匪三四千人在黑樓門一帶焚掠勾結川楚竄匪擾至涼水井一盪水大埡口等處道路梗塞觀成現與劉君輔徐昭德圍剿老木園賊匪急切不能移剿因酌派馬瑀帶兵馳往添募鄉勇堵截等語查觀成及劉君輔等一路官兵不過二千

餘人茲賊匪兩面牽制勦辦實覺不敷

臣

惠齡等卽由乾

溪口一路前往大甯以期與觀成等乘勢夾擊復接達音泰具報該鎮等於二十五日行抵巫山正在城外苟家坪官家山一帶拏卡卽有賊匪三四千人由馬家口前來分路攻撲另有一起賊衆進逼縣城官兵併力勦殺賊匪退而復前者三次愈聚愈多經達音泰與溫春長春劉廷基參將岳廷極吉林泰等分投迎截殺賊三百餘人生擒二十四名匪衆退回三十里屯劄等語因念巫山緊要恐達音泰等兵力不敷當留興肇會同明興駐守夔州

臣

宜縣

督同舒亮穆克登阿等現在開萬勦辦新起之賊

臣

明亮

德楞泰惠齡等趕赴巫山大甯截殺賊匪務期迅速廓清
不敢稍有稽滯

諭曰明亮等現由水路前赴歸州去巫山已遠所有夔州一帶賊
匪卽專交宜縣督同各路官兵上緊剿辦現在各首逆內齊王
氏姚之富已竄至歸州明亮德楞泰前已自歸州迎至牛口石
門一帶截剿該處地勢阨塞有險可據若將齊王氏姚之富擒
獲賊黨自可不攻而潰現有惠倫阿哈保帶領東三省官兵趕
赴協剿明亮等務卽趕緊剿盡不可稽緩此次打仗陣亡之千
總包成功等俱著加等優卹

十九日

諭曰汪新奏川楚竄匪直趨歸州明亮德楞泰聞信卽從水路趕至兜剿所辦尙合機宜今賊匪復向興山一帶奔竄明亮等若能迎頭兜剿擒獲首逆固屬甚善卽賊匪尙在奔竄明亮等當緊攝賊蹤使之無暇焚搶奔走疲乏自可易於剿洗

二十二日

諭曰前次明亮德楞泰因截剿後股石門牛口賊匪以致頭股乘間東竄現惟當將後股賊匪剿淨趕赴南漳緊躡賊蹤奮力截剿其大甯新起賊匪欲與老木園合夥前經劉君輔馬瑞等擊退惠齡恆瑞慶成等又由乾溪口一路前往夾擊務當上緊兜剿不可再令東竄擾及二竹爲要

二十五日

公偕明亮奏言楚境巴歸一帶被賊匪竄入焚搶忽分忽合_臣等於初四日就現有船隻先帶兵三千餘名趕抵歸州卽於紅土巖紮營兜截賊匪直奔巴東之石門大葉牛口等處焚掠勢欲搶渡南岸占據縣治先經派令總兵達音泰木騰額由葉灘追擊兩次接仗擊斃三百餘人賊始向龔家橋奪路竄回_臣等正慮官兵稍單適明興在夔巫督辦軍需趕雇船隻將後起官兵二千餘名全數送到初八日早探得賊匪合爲大隊移屯歸州之白馬灘歸坪黑石坂涼風坪等處連接二十餘里均距州治甚近人數不

過萬餘

臣

等當卽移營白家山地方初九日

臣

等率領侍

衛將弁等帶兵進攻白馬灘賊匪蜂擁出迎經官兵轟斃騎馬賊目七人乘勢衝突自辰至申攻克賊營三座殺賊三百餘人該匪俱向歸坪黑石坂奔竄初十日官兵移營香溪逼近拏卡十二日黎明臣等復帶官兵由黑石坂大路進攻派令達音泰同侍衛西拉布等帶兵攻黑石坂東首木騰額同侍衛法依當阿等帶領鄉勇一千名出小路抄上黑石坂後山暗伏同知陳桂生等帶領鄉勇八百名在黑石坂涼風埡適中之地設伏以截賊人接應臣等三路並進賊人搖旗吶喊分投迎拒官兵三面兜剿攪殺一

處賊人欲思翻山逃逸經道員陳蘭森同知德廉州同符元魁典史鈕正綰等率領鄉勇自山後壓下槍礮並發賊人不能衝突官兵乘勝圍剿斃賊約五百餘人割獲首級一百七十三顆生擒傅長彩彭正宗等十三名正在剿殺之際涼風埡賊人由王家山一路前來接應該匪行至王家山半坡同知陳桂生知縣胡密鹽大使鄒瀚從九職員周以燝等督率鄉勇從山頂林內突出壓斃矢石俱下斃賊七八十人生擒王大發等九名當將接應之賊截回黑石坂賊人退至山半將沙土乘風簸揚並分然草把濃烟散布使官兵莫辨其所在臣等察其詭計知該匪等必乘

間奔竄飭令官兵分路攔截賊人俱由山腰曲徑及溝礮
內紛紛竄逸官兵趕上截殺復斃賊百數十人其先遁之
賊俱歸入涼風埡一處臣急欲乘勝圍剿詎十四日進攻
該匪等出而接仗者僅一千餘人據獲賊供稱衆賊目等
連日於夜間潛分數股翻山越嶺至大峽會城一股衝開
鄉勇卡隘前去僅留此股賊匪在後臣等當飭官兵向前
剿殺該匪一見卽行敗竄竊思隨後追擊卽將此股賊人
剿盡而前遁之賊已遠反墮賊人奸計並據宜昌府王春
煦稟稱另有一股賊匪奔入興山該處亦無城垣鄉勇堵
禦不住是賊匪時分時合前竄者乘虛四出留後者牽綴

官兵實爲狡詐官兵總須抄出賊前方可攔截制勝連日
拏獲賊匪供稱兩路之賊約在宜昌荊州等處會合總要
同赴襄陽臣等莫若帶兵仍由水路徑抵宜昌無論何路
賊匪向何處奔逃均可兜截若日內該匪奔過宜昌府城
臣等竟順流而下直至荆襄一帶迎剿可以遏賊人去路
已飭令知府嚴士鉉趕辦船隻三百餘號卽儘此裝載官
兵相機兜截又查歸州州治背依山麓前臨大江旣無城
垣又無險可守且聞川省燕子山等處新起賊匪雖有舒
亮穆克登阿截剿亦有入楚會合之語查興肇所帶駐守
白帝城之滿兵一千名先經飛札抽調來營現已趕到卽

將此兵暫駐歸州州治以資鎮壓

諭曰明亮等仍由水路趕赴宜昌兜剿所辦尙合機宜但摺內止稱賊匪擾及興山而汪新昨奏前股賊首齊王氏等已竄至保康南漳之後界坪明亮等探明賊蹤自當由宜昌登陸徑赴南漳一帶緊躡追剿此時王文雄帶兵踵至汪新現駐襄陽郡城而湖南撤回之兵由辰州順流而下計已可到襄陽賊匪自不敢竄入若卽折回南遁則明亮等自宜昌而來正可迎頭截剿

二十八日

諭曰汪新奏稱賊匪滋擾保康之張飛壩該處逼近南漳自卽係由南漳竄往房縣之賊其由興山衝過霧渡河賊匪想必另係

一股明亮已統兵前赴宜昌德楞泰帶兵已抵荊州卽日赴當陽截剿有此兩路大兵前後夾擊當乘此機會速剿完竣

八月初四日

公奏言查霧渡河賊匪肆行侵擾衝突卡隘

臣

等正擬督

兵進剿適接汪新札稱賊匪又分竄至當陽一帶勢甚猖獗官兵如由大江直下卽可迎頭截殺等語查楚北州縣兵守空虛賊衆如至當陽遠安則荊州卽屬可虞如至南漳則襄陽又受其蹂躪分兵進剿則力愈單薄若一處合擊又恐不能兼顧隨商之明亮留兵二千有餘於宜昌設法剿辦

臣

卽於十七日帶兵三千餘名由水程漏夜趕至

荊州可以繞赴賊前迎擊十九日辰刻到荊與汪新會晤二十日早帶兵前赴當陽探聞賊匪離當陽之宋家壩地方僅四十餘里山勢險要先經汪新派協領富清帶滿兵四百名并該縣汪雲銘帶鄉勇千餘名駐彼防守臣於次日督兵前進並派守備馬應國帶奮勇兵三十名前往探哨見賊匪已向東北遠安一帶奔竄追擊活賊阮思宇訊係賊匪遣來探信之人知遠安無兵現在賊匪已分赴該縣圖據縣城卽可進撲當陽當將該犯正法又據遠安縣石燿稟報賊匪已擾至縣境四十餘里之楊家坪爲數甚衆城內無兵守禦請卽派兵分剿卽將宋家壩卡隘交協

領富清并該縣督率兵勇防守當飭副將長春扎爾杭阿等先帶官兵一千名並派巴圖魯侍衛阿納保等帶馬兵三十名飛赴遠安城內彈壓堵剿臣同鎮臣達音泰等星夜帶兵馳往二十四日黎明抵縣賊匪正在楊家坪一帶焚燒直衝縣城臣督令達音泰巴圖魯侍衛溫春等帶兵分兩路迎擊槍礮並發相持數時之久賊匪抵死抗拒擊斃賊匪百餘名賊始退據楊家坪並於沿山孛卡縣長二十餘里時天已晚官兵暫於蘆溪嶺駐紮各兵到齊卽行趕緊進攻務期擒獲首逆再臣沿途見遠安居民扶老挈幼紛紛逃徙情殊可憫現飭隨營道府等逐加安撫并諭

以大兵卽日到來小醜立可殲除爾等正當秋穫之時毋得驚惶失業如此時將已熟禾豆拋棄轉使賊人得計並繕示各處貼掛該縣民人聞信欣然現在陸續復歸故土至南漳兵守亦單現在王文雄帶領豫兵取道襄陽似可卽令徑赴南漳防堵並可遏賊匪前赴襄陽之路俟臣將遠安賊匪殲除卽行合擊更爲得力

諭曰德楞泰於賊匪在楊家坪焚殺時卽督兵分路迎擊所辦俱妥遠安無兵防守賊匪乘間竄入幸官兵繞赴賊前迎頭截剿得以保護實爲可嘉德楞泰著賞玉喜字牌大小荷包仍速將楊家坪賊匪上緊攻剿並著明亮由宜昌一帶迅速剿辦卽行

馳赴遠安與德楞泰兩面夾擊

初六日

諭曰汪新奏當陽遠安一帶賊匪紛突無常有明亮德楞泰兩面夾擊賊匪不敢前往荊州恐其竄至荊門州一帶汪新不敢拘泥卽赴襄陽所見俱是至所稱賊匪從洋坪繞入縣境之呼兒總地方焚掠一節洋坪在德楞泰駐劄之蘆溪嶺對面而明亮現在宋家埡互相犄角相距均屬不遠想賊匪因聞官兵進剿又竄往呼兒總地方未必果係繞至官兵之後明亮德楞泰一得此信自己追往兜剿不使賊至當陽滋擾德楞泰總當設法夾擊擒獲首逆爲要

初十日

公偕明亮奏言

臣

德楞泰於遠安楊家坪地方獲有勝仗

二十五日各兵到齊次日黎明由舊縣茅坪西風垭進攻

賊人吶喊迎前

臣

帶兵搶上山梁併力轟擊將賊人頭二

卡衝開殺賊一百二十名生擒陳名揚劉秀坤等十七

名奪獲槍矛木礮餘賊棄卡逃遁始向西北一路狂奔官

兵緊跟追擊復折向東北面洋坪土地垭等處四竄

臣

德

楞泰卽督兵由大小巷口跟蹤進擊一面飭將弁兵勇分

投搜捕一面飛咨明亮繞道向東兜截

臣

明亮是日同興

肇自宋家垭由遠安西面緣豆垭一路剿捕前進沿途山

溝林內搜獲匪賊劉會仁等四十六名盤獲冒充鄉勇之
奸細王文選等七名均係潛探卡隘虛實之犯卽行正法
行至大埡口地方接德楞泰來信知遠安包巾寨楊家坪
等處俱經廓清賊人剿敗後向東北竄逸查遠安北面洋
坪土地埡緊連當陽呼兒總且與荊門州接壤荊門爲荊
襄適中之地關係緊要當卽取道當陽小烟墩等處星夜
遄發二十八日午刻臣明亮行至溝溪河地方適臣德楞
泰亦由武雁山追趕到來兩路會合二十九日併力並進
於腰亭地方拏獲哨探賊匪甘廷秀等三名訊據有欲折
回當陽進窺荊州之語臣等以賊匪屢經剿敗希圖往復

竄擾不可不乘勝兜截八月初一日官兵進至觀音寺賊人聞風退屯當陽荊門州南漳交界之施家河東鞏一帶查南漳現有王文雄帶兵堵剿荊門州雖設有鄉勇究不足恃臣等現已繞赴荊門州之西迎頭攔截不獨該州可以保障卽當陽荊郡均能捍衛若賊人繞出南漳北竄襄陽臣等亦得趕上兜截斷不與賊以暇再查歸州爲楚蜀水陸門戶誠恐川省雲萬一帶賊匪被剿情急復乘間入楚是以前在歸州起行時曾商留興肇帶滿兵八百名駐守嗣因前敵兵丁不敷興肇趕赴宜昌協剿臣等酌商將後起滿兵五百名札飭協領喜格管帶由夔巫趕赴歸州

會同遊擊俞國智所帶兵二百名設卡防堵

諭曰據奏分投攻剿各得勝仗但殺賊無多而賊匪仍向東北竄逸未能截住乃猶靦顏爲此虛詞具奏實爲伊等恥之至興肇旣抵明亮軍營斷無復回歸州之理明亮等現今協領喜格將後起官兵五百名留歸州防守亦足以資堵禦再施家河一帶與南漳交界前因興山賊匪分向南漳房縣一帶竄聚令王文雄帶兵往剿並令景安前往調度設施家河之賊亦竄至南漳明亮德楞泰正可會同景安王文雄等夾擊迅速蕩事

十一日

諭曰惠倫阿哈保所帶東三省官兵已到景安復將所調兵一千

名交與惠倫等帶領前往南漳會合王文雄截剿其山東山西官兵陸續亦可到來是北面一帶已有官兵堵截而明亮德楞泰復自遠安荆門州追剿而來兩面夾擊賊匪雖多亦無難悉數殲除但此時賊匪分股奔竄首犯齊王氏姚之富是否在明亮德楞泰所追賊匪之內抑或在王文雄所追賊股之內總當探明首逆蹤跡併力擒獲

十五日

公偕明亮奏言

臣

等於初二日自荆門觀音寺率兵進攻

賊衆聞風由東輦竄向陸坪辛家坪七邱田腰盤寨等處查陸坪辛家坪距荆門石橋驛甚近七邱田與鍾祥接壤

腰盤寨又離宜城不遠

臣

等察探賊情自宜昌遠安勦敗

之後一聞官兵信息卽行遁去欲使官兵兼顧不暇以便乘間竄出萬一賊人擾及石橋驛宜城等處不特驛站梗塞且大路平坦堵剿更覺掣肘隨飭巴圖魯侍衛阿納保溫春等帶領兵勇一千餘名繞道馳赴宜城縣守禦一面親率兵丁由姚家河仙居鄉留厚集一帶前進以絕賊人竄往石橋驛來路詎賊人知石橋驛一帶有備卽由腰盤寨武安堰直竄宜城

臣

等探知星夜前進行至徐家集地方接據副將劉廷基及該縣等稟稱初五日賊匪自腰盤

寨撲卡直入勢甚兇悍現離縣城約十餘里等語

臣

等卽

率同興肇達音泰等先帶馬隊兵丁加緊進發爲掩襲之計遂由石灰窰小道繞至江岸抄出縣城東北迎頭兜截其時賊人進逼縣城相去祇五六里臣等趕上直前衝殺賊人恃地勢平行四路排列蜂擁前來希圖兜裏經馬隊官兵擊射賊不敢進猶復施放槍礮抵拒相持一時之久後隊官兵趕到併力攪殺斃賊三百餘名生擒李成貴等八名賊人狂奔敗走官兵乘勝趕殺追至襄陽小河口幸張文奇先將沿河船隻提赴對岸賊匪不能竄渡臣等帶兵趕到時已向晚與賊人對面紮住連用槍礮轟擊擊斃甚多臣等正在運取火炬乘夜圍剿三更時賊匪向北竄

走官兵立即追擊至獨樹塘地方天已將明適景安會同
惠倫阿哈保等帶領東三省勁旅前來合兵夾剿賊人志
在直奔襄郡經景安等自北而南攔截去路臣等在南面
擊殺賊人首尾不能相顧折向西南竄走該處地勢四通
八達惠倫阿哈保率領勁旅分投抄擊賊衆披靡四竄捨
命狂奔官兵益形趨健追殺二十餘里殲戮賊匪五百餘
名生擒周明模李秀等二十一名餘賊向仙女山丁家集
一帶竄遁臣等因恐山徑崎嶇東三省兵丁不便馳驟當
令撤回此次兩面夾攻不獨荆門宜城可保無虞亦不能
衝犯襄陽再行北竄皆賴

聖明先事豫籌實足壯軍威而寒賊膽再查賊匪自川省竄至歸

巴一帶其初時分時合亦不能定其股數

臣

等先經獲賊

訊據供齊王氏姚之富卽在屯聚歸州一股賊內是以

臣

等卽由歸州宜昌遠安前來跟蹤兜剿邇日賊人分竄之路雖有三股其實相隔皆不過百里內外連日獲賊訊供仍僉稱齊王氏姚之富皆在此股賊內但據保康房縣二處所獲賊供亦稱姚之富齊王氏爲首三股賊匪所供逆首相相同明係賊人狡詐希欲惑亂官兵並有齊王氏尙在川省之說其供詞均不足深信

臣

等細察情形知賊人總

思各回本處自川省竄回一股定係齊王氏姚之富等而

惠齡等在川省勦辦一股定係王三槐徐添德等現已分飭各路確實查明再行具奏

諭曰此次賊匪自荆門直犯宜城若明亮德楞泰不能緊蹙賊蹤或致乘間紛擾宜城稍有疎虞則賊勢漸張今明亮德楞泰並不子賊以暇自荆門星夜前進當賊匪將至宜城之時繞道兜截得以痛加殲戮而景安初抵襄陽時兵力稍單若遽行輕進轉恐賊匪窺知虛實是以持之鎮靜一聞明亮德楞泰帶兵兜截卽率同惠倫阿哈保由北面奮擊輕重緩急均合機宜賊匪經此番官兵兩面夾擊之後紛紛潰敗不獨宜城已保無虞卽襄陽亦可安堵所辦實屬可嘉明亮著賞給嵌珊瑚松石帶扣

德楞泰著賞給雕象牙帶扣景安著賞給嵌松石帶扣並各賞
玉搬指大小荷包與肇惠倫阿哈保王文雄均爲出力著各賞
玉搬指大小荷包達音泰木騰額張文奇胡齊崙著各賞大小
荷包以示獎勵現在賊匪入山竄逸扼險圍剿較平地尤易爲
力明亮德楞泰等總當督率官兵整隊進剿併力圍截務將首
逆拏獲則大局已定其餘分竄零星賊匪自可不攻而潰矣

十七日

公偕明亮景安奏言伏查教匪自上年至今竄及數省雖
各路剿殺爲數以千萬計而首逆尙未成擒餘黨不形減
少實緣該匪等始尙據險屯聚猶得合圍進搗近日則東

奔西竄無久占之地無一定之所以劫掠爲生行不必裹糧住不藉棚帳所過村莊市鎮人民多被逼脅以致夥黨日多分股竄擾使官兵應接不暇而楚北襄鄖荆宜各屬犬牙相錯道路叢歧難以一一堵截至於官兵勦捕之法迎擊勝於尾追兜擒勝於散逐

臣

明亮德楞泰前自巴歸

一帶前來如歸州宜昌遠安當陽宜城襄陽各郡縣未嘗不繞赴賊前抄截但兵力以保城爲急則村市已被焚掠以保荆襄爲急則保康房縣各股已難兼顧更可恨者官兵採賊所向窮日夜之力趕赴賊前而賊匪一見官兵非折回返走亦必橫衝旁竄往往迎頭轉成擊尾官兵若由

後追殺則任其所之不能攔截若再欲繞道抄殺則路遠
兵疲卽幸而趕上難保賊人不又他竄且官兵行走口糧
軍火鍋帳器械均須量爲裹帶逐日設卡拏營此皆賊人
所無類此情形勦辦驟難得手今計三股賊衆共二萬有
餘其中騎馬賊不下三四千臣等現帶各兵內馬隊不過
六七百名其餘悉屬步兵今蒙

聖明洞察調撥吉林索倫兵三千名又發馬八千匹竊思東三省
勁旅若與尋常漢兵爲伍行走未能迅速無以逞其驍勇
徒致兵乏馬疲莫若俟該兵丁到營後臣等再於健銳滿
兵各省綠營官兵內挑出千名合之共得精銳馬隊四千

餘名其屯土撒拉爾兵丁行走較捷亦酌量挑派以爲後
隊接應分作四路臣等分投管帶晝夜進擊且額爾登保
勦辦成子口賊匪卽日竣事可趕抵臣等軍營將此項官
兵交其帶領尤爲得力該兵丁等壯健趨捷不獨慣於馳
騁嫻習槍箭且能藉草爲宿炙肉爲飼可以不帶鍋帳不
待糧運實爲綠營漢兵所不能至現在各省綠營兵及調
到直隸山東山西兵丁分設四面要隘以爲外圍更番戰
守則各路不致空虛實於堵剿大爲有裨臣景安現在籌
辦肉乾炒米等物以備進剿時分給裹帶計每兵每十日
給以所需米肉攜帶亦不累重並令襄陽道府等照樣寬

爲備辦源源接濟俾糧足馬強以便晝夜緊追截殺使賊
匪眠食無暇定可次第掃除以收實效現在竄往南漳保
康房縣等處之賊臣等鼓勵兵丁趕緊籌剿亦斷不敢稍
有延挨再查原任廣西宣化縣知縣梁友穀係襄陽人告
病在籍因賊匪滋擾率同伊子文童梁印文在程梢渡修
築土堡收養男婦老幼鄉民十餘萬並團聚鄉勇設卡防
堵賊匪竄至該處梁友穀父子率勇堵禦附近村莊未致
被賊蹂躪洵屬急公向義出力可嘉又襄陽武生梁大烈
蔡運升武童蔡正升張鳴來上年隨營出力經湖廣督臣
分別給與行營千把總外委頂戴該弁等此次在程梢渡

隨同梁印文堵禦賊匪亦屬出力又鄧州文生彭騰蛟自上年以來帶領鄉勇隨同堵剿實屬奮勉此次派防守江岸亦能不辭勞瘁又探得房縣另股賊匪已由竹山向西奔竄距陝西紫陽平利一帶較近紫陽地方原派總兵富爾賽帶兵二千名駐劄防堵嗣經宜縣調赴川省協剿臣等因宜縣現調甘肅官兵日內可到陝境已飛咨秦承恩於此次官兵內酌留一二千名在陝楚邊境擇要堵截其餘先令馳赴宜縣軍營聽候調遣

諭曰明亮等奏籌剿事宜所見亦是但明亮德楞泰前在四川帶兵追賊至楚此次賊匪本起自湖北明亮彼時亦在襄陽一帶

與景安統兵剿辦迄今年餘任賊東奔西竄兵疲追捕墮其奸計是誰之咎今爲此奏未免已遲現在各省兵丁早入豫境東三省勁旅計日亦可到楚明亮德楞泰卽照所奏機宜悉心布置務於一兩月間剋期蕆事

又

諭曰明亮等奏原任宣化令梁友穀團聚鄉勇奮力捍禦等語梁友穀告病在籍因賊肆擾率同伊子悉力堵禦附近村莊得以保全洵屬急公好義該員現已年老著加恩將伊子梁印文賞給八品頂戴以縣丞卽用武生梁大烈等前經給予行營千總等銜著各該撫遇有缺出卽分別拔補生員彭騰蛟並著賞給

八品職銜以示鼓勵

二十三日

公偕明亮奏言賊匪前在獨樹塘地方經官兵擊敗折回西南仙女山丁家集一帶竄走

臣

等察其路徑似欲竄往

南漳但據屢次獲犯僉稱賊人總思北渡襄江竄入豫省是折赴南漳形跡竟欲將官兵誘入山內以便乘間出山赴江岸搶渡奔竄

臣

等再四熟籌此時賊衆路歧與其竄

越江岸不如逼向西南山內可以扼險截剿况賊人狡詐異常萬一官兵跟蹤緊擊其前隊之賊或又分股折竄江岸躡淺偷渡轉墮賊人奸計

臣

當飭守備馬應國等自丁

家集緊跟賊匪前進躡看趨向一面令鎮臣長春副將劉廷基等帶兵二千名先由襄江南岸進發以安沿江各市鎮民心卽一路馳赴穀城幫同原任總兵彭之年扼要防堵臣等卽由隆中石牌嶺前進途中據馬應國稟報並據拏獲哨探賊人供稱賊匪自丁家集西竄後果卽由石廟等處北走欲焚擾茨河鎮搶船直渡襄樊上游商民殷庶臣等聞信後連夜前進十二日午刻行至茨河鎮正值賊人自西南一帶焚擾出山該處居民甚形惶恐臣等當將兵丁在市鎮前山梁紮住察看地勢東面楓樹壩一處爲達茨河鎮後路要隘西面耗子溝一處爲達石井沖江岸

要隘官兵由此兩路進發則可絕其北竄並可兩面夾擊
臣明亮同興肇副都統阿哈保帶領巴圖魯侍衛將弁等
由楓樹埡一路進剿臣德楞泰同惠倫達音泰帶領巴圖
魯侍衛將弁等由耗子溝一路進剿其時賊匪已由南子
山直衝楓樹埡前來約六七千人內衝先騎馬之賊約七
八百名吶喊搖旗肆無忌憚臣明亮當同興肇將埡口左
右山頭紮住賊人捨命撲上三次官兵礮擊箭射奮力壓
剿擊斃賊匪甚多西面耗子溝一路亦有賊六七千人衝
撲臣德楞泰同惠倫達音泰率兵排列山頭賊人撲上山
礮達音泰手射二賊賊勢稍卻惠倫同巴圖魯侍衛率領

滿漢馬兵首先下壓衆兵並進

臣

明亮興肇又自楓樹砦

追擊前來兩面夾攻痛加勦殺惠倫阿哈保達音泰率領

三省墨爾根官兵衝進賊隊各射賊一二名二三名不等

共殺賊七八百名生擒劉登發等二十九名賊人捨命逃

向金牛寺時天色已晚官兵紮住石井沖次日

臣

等復率

兵進勦賊又向枯樹溝屏風寨一帶奔往穀城廟灘該處

亦屬臨江市鎮一面飭長春率兵移駐一面飭步隊兵丁

自石井沖沿江進發

臣

等帶領馬隊兵丁跟蹤追殺沿途

殺斃多賊追至茅坪村前隊賊人正在炊食官兵從林內

抄出截殺攻其不備賊人潰亂奔逃官兵分投擊殺斃賊

四百餘人生擒袁萬相等二十七名搜出被擄男婦一百七十三名口訊係逼脅入夥均發交地方官管押保釋至袁萬相等犯逐加研訊據供均係從教多時隨同焚掠袁萬相劉登發二犯係偽封副帥首先臨陣指揮尤爲可惡卽分別斬梟戮割查此股賊匪總思搶越襄江前入豫境現屯穀城之南新店子等處臣等因沿江一帶最關至要恐其乘虛竄渡必須自北攔截現在所帶官兵已抵花石嶺地方並恐該匪竟奔均州竹山竹谿一帶希圖闌入陝境前已咨明秦承恩截留官兵在陝省邊界防堵臣等日內連得勝仗士氣倍增卽當乘勝截擊務使逼向一處並

力圍勦以期先擒首逆早慰

聖心

諭曰明亮等奏迎擊北竄賊匪情形所辦深爲可嘉昨據景安奏
穀城一帶竄聚賊匪經明亮德楞泰帶兵追勦殲賊甚多而未
據明亮等奏報正切懸盼今據奏到兩次殺賊共有千餘官兵
大得勝仗賊匪竄至穀城南新店子等處屯聚明亮等自北攔
截扼要防禦並於沿江一帶派兵防堵不能偷渡北岸竄入豫
境調度俱合機宜明亮德楞泰俱著加恩賞用紫韁以示優獎
仍各賞給洋鑲盒松石鼻烟壺大小荷包與肇惠倫阿哈保達
音泰長春著各賞瑪瑙鼻烟壺大小荷包以示獎勵其探聽賊

信之守備馬應國驪探迅速官兵得以預行截剿著以應陞之
缺陞用

恭錄

聖製詩

避暑山莊回蹕至喀喇河屯行宮作疊去歲韻

周歲光陰瞥眼期行宮秋景未殊斯閱豐有象誠幸矣

今歲各省奏報

秋收多在八九分以上關外亦俱一律
豐稔蹕路所經崇甯比鄰誠堪欣幸

望捷依然實愧之川竄

楚逃賊氛盡

陽遠安宜城地方經明亮德楞泰帶兵繞至賊前

截剿屢殲賊衆近據奏報於穀城耗子溝楓樹壩復連得勝仗
殺賊千餘賊勢日蹙而額爾登保圍剿帽子山賊已層層緊逼
無路可逃其方山坪老木園之賊經
宜縣及觀成等圍剿已各辦理得手
雄兵強將衆威滋

近因剿辦川楚

賊匪官兵日久未免疲乏因發吉林索倫勁旅三千令惠倫阿
哈保愛星阿帶往此項官兵一以當百又調直隸山西兵共五
千名合之原有官兵已及數萬聲威壯盛以七凶佇待生擒首
之勦捕竄匪直如摧枯拉朽成功定在旦夕
襄陽鄭陽一路教匪滋事係姚之富齊王氏李全爲首犯長陽
一路係林之華覃嘉耀爲首犯東鄉則係王三槐達州則係徐
添德賊匪么麼烏合總因首逆未獲是以東奔西竄到處勾結
屢飭帶兵大員惟當將此七凶設法生擒其餘黨自必潰散易
於搜捕淨盡連日川楚各路俱屢經奏報歸蹕迎看露布馳
得勝惟首逆尙未成擒不能不切懸盼耳

九月初三日

諭曰現在前股竄匪已至白河洵陽而後股竄匪仍在均州明亮
德楞泰二人內應酌分一人速帶新到勁兵迅赴陝境幫同恆
瑞秦承恩分投堵剿

十一日

公偕明亮奏言查賊匪經官兵連次勦敗之後由孫家灣
石堰花果園一帶向西奔竄臣等察看賊情若不分頭攔
截徒事追擊賊匪或北渡漢江或西竄陝境皆費周章必
須將西北兩面賊人奔竄之路堵截使賊人前無去路勢
必折回官兵由石堰花果園前進不惟可爲東北穀城均
州一帶捍衛且正可迎頭截擊一面飭副將劉廷基都司
張朋帶領兵勇由鄖陽江岸相機進發自北兜襲一面飭
守備馬應國帶領兵勇堵截臣等率兵由石堰等處自東
而西二十九日行至花果園時值霧雨交作探知賊人竄
及黃龍灘意欲北犯鄖郡西擾斗河俱聞設有兵勇且漢

江斗河內船隻俱經撫臣景安派員押赴對岸賊人不能

前進果向東南一路折回臣等連夜冒雨趕至草甸地方

正遇賊匪分馬步五路前來臣等探明路徑亦飭官兵分

五路進剿臣明亮率領巴圖魯侍衛阿那保鎮臣長春等

帶兵搶上迎面左手山包臣德楞泰率領巴圖魯侍衛西

拉布鎮臣木騰額等帶兵搶上迎面右手山包惠倫阿哈

保溫春等帶東三省墨爾根官兵及滿漢馬隊兵丁向山

麓大路進擊興肇率領巴克坦布等帶滿營馬步兵丁由

左手吳家灣山梁進擊達音泰同副將李文蔚等率領屯

土官兵由右手王家場山梁進擊飭令遊擊蕭福祿等帶

領撒拉爾回兵設伏王家場山後截擊臣等排列甫定賊

人蜂擁猝至其左右山梁之賊先進犯興肇達音泰兩路

官兵希圖搶占山梁經興肇達音泰率兵站定山頂奮力

擊殺賊人見山頂兩路官兵奮勇左右山溝內又抄出兩

股賊衆直撲臣明亮德楞泰所占山包希圖兜裏官兵後

路經臣等督率將弁官兵分投壓勦槍礮矢石並下賊人

連撲三次被官兵擊殺無數賊人竄走臣等趁勢下壓追

擊西面山坳林內突出騎馬賊六七百人向大路飛奔接

應經惠倫阿哈保温春率領勁旅馳擊賊人膽敢撓鋒前

進被官兵槍礮箭射人馬俱斃賊匪策馬四竄惠倫阿哈

保溫春首先追擊衆兵勇氣倍增箭無虛發賊衆披靡回
西急逃而臣等所擊兩路匪衆見騎馬接應之賊窮蹙在
奔亦捨命竄走經惠倫阿哈保溫春等帶兵追殺并飛馬
抄向賊前兜截與臣等兩面夾擊當痛加殲戮之際其左
右山梁兩股賊衆又經興肇達音泰壓勦下山五路官兵
追擊兜殺將賊匪逼向九鋪灣楊溝口等處刀砍矛扎及
槍箭所斃共計一千三四百人生擒活賊一百二十三名
婦女一百八九十名賊人情急向西南山澗自投官兵併
力轟打擊斃及投澗死者不下二三百人後隊賊人亡命
奔逸卽從澗內積屍之上倉惶逃遁竄上陳家山梁惠倫

阿哈保温春達音泰等率領滿漢馬隊屯土兵丁渡澗追殺遊擊蕭福祿都司馬良棟率撤拉爾回兵搶上山梁截擊騎馬賊人乘山霧迷漫翻山飛竄惠齡阿哈保温春達音泰率馬兵追擊阿哈保所騎之馬忽被槍傷遂換騎跟役之馬進追馬復被槍不能前進協領傅德防禦五十七及該副都統跟役二名趕上抵殺俱受矛傷陣亡惠倫達音泰見阿哈保連傷二馬并見賊隊內有執紅白旗指揮衆匪者三四人料係首逆恐其遠遁飛馬進追至長坪地方將一執旗頭人之馬射倒正欲趕上生擒詎餘匪捨命搶護直前格鬪惠倫奮力擊射立斃數賊猝爲賊槍所中

墜馬復受矛傷二處竟至陣亡佐領福蘇及親隨護軍校
舒靈呢馬訥藍翎長雙靈保等直前救護亦被槍傷同時
陣亡阿哈保達音泰溫春帶兵搶上竭力攻擊將賊壓下
蕭福祿馬良棟亦帶撤拉爾回兵趕至抵剿連斃十餘賊
賊始敗逃從陳家山內大堽口竄走官兵復追過兩座山
包賊人俱竄屯大堽口後山大梁該處山高林密官兵自
卯至未力戰多時又值山霧愈大前進恐不得力當令於
大堽口暫行休息自此前進重山層疊可以扼要堵剿臣
等卽日率兵緊躡進剿相機兜截總不與賊以暇賊匪自
難肆逸再惠倫自抵軍營奮勇殺賊今臨陣捐軀臣等不

勝悵悼愧憤當經購備一切卽日委四川都司楊森及千
總等員就近護送至鄖陽由水路先至襄陽俟吉林索倫
及各起官兵到齊再令委員楊森及該家丁護送遄歸現
已咨明撫臣汪新查照辦理

諭曰明亮等兜截孫家灣一帶賊匪沿途截殺一千七八百名所
辦皆好但惠倫因射倒執旗賊目正欲趕上生擒猝中賊槍墜
馬復受矛傷陣亡可惜之至惠倫係明瑞繼子念伊父子均屬
陣亡已另降諭旨格外加恩矣所有督率打仗分路帶兵各員
自當加之獎賞以作其氣明亮德楞泰著俱賞嵌玉帶頭帶環
玉搬指大小荷包興肇阿哈保達音泰木騰額長春溫春著賞

玉搬指大小荷包其打仗陣亡之協領傅德佐領福蘇防禦五十七護軍校舒靈呢馬訥藍翎長雙靈保俱著咨部加一等優卹此時賊匪雖不能向西北奔逃但現由大埡口竄入山內該處重山層疊無難扼要堵禦總在明亮等設法擇險堵截將賊匪圍住山內立即生擒不可再令突圍而出竄至房縣保康竹山竹谿一帶

十六日

諭曰現在明亮德楞泰屢殲賊衆軍威已振又調往之吉林官兵俱已到彼其黑龍江官兵及察哈爾馬匹日內亦可陸續到齊明亮等正可馳驟殺賊惟是賊匪見官兵聲勢浩大自必分竄

狂奔若前路無兵堵截則賊匪四散逃逸必致仍前尾追使生
力勁兵又形疲乏宜縣惠齡恆瑞等卽不能痛殲賊匪豈亦不
能堵截其竄走之路乎著該督等務須探聽賊蹤設法布置預
行堵截使賊匪無從乘間奔竄明亮等得以盡力勦殺而明亮
等亦當察看情形或於新到官兵內派令得力將領酌量分帶
勁兵覓道繞出賊前首尾合擊自更可事半功倍也又汪新料
理吉林官兵起程前赴軍營並調備馬匹等事所辦尙好道員
保定節次堵禦賊匪幫辦軍需勉奮出力著加恩賞戴花翎以
示鼓勵

二十日

公偕明亮奏言

臣

等帶兵緊躡賊蹤行至高賢川地方拏

獲隱伏山坳探望官兵之賊六名訊據供稱自到湖北以來被官兵處處繞道抄殺傷折數千人今被官兵逼到房縣從房縣翻山出去可以由竹山竹谿逃到陝西或者山路幽僻可以覓路前去與前竄往陝西白河一股合夥好敵官兵等語

臣

等查房縣竹山竹谿鄉勇頗稱勇往當飭

該處府縣及各卡鄉勇嚴加防堵一面飭副將劉廷基都司張朋帶領兵勇繞赴揚圩口堵截使賊人不得進擾房縣

臣

等率兵由馬家洞太山鋪一路前進賊匪初由羊子

山西竄汪家河經該處鄉勇截殺不能衝越遂東竄地丁

鋪思欲進擾房縣又經劉廷基等迎擊復向西南毛坪軍

馬鋪一帶奔逸

臣

等進至汪家河察探賊人連日奔突一

聞前有官兵卽行他竄非出其不意兩路兜剿不能截殺

查軍馬鋪以西卽入竹山縣境復飛飭劉廷基等帶領兵

勇跟蹤進追以堵賊人折回房縣之路

臣

等率兵由馬尾

三家塘抄向賊前攔截初六日官兵進至界山塘正值賊

人自芹口前來衝突鄉勇卡座

臣

等當派巴圖魯侍衛溫

春鎮

臣

木騰額等帶兵分隊於山頂林內設伏待賊大隊

行至山前突出剿殺賊匪倉卒不能抵拒卽亡命狂奔被

官兵橫衝兜截斃賊二百餘名其後隊賊人卽竄上西南

山梁思遁

臣

等同興肇率阿哈保等帶馬隊及屯土兵丁

飛追進擊復斃賊百餘人餘賊翻山由東河西竄

臣

等察

看路徑東河之西卽爲小深河田家壩離竹山縣城二十

餘里該處鄉勇現在有赴陝西白河一帶協剿者有在斗

河一帶防堵者萬一賊人竄至彼處恐近城一帶村莊不

無驚恐遂由霍山繞出竹山縣城南馳赴小深河初九日

午刻至北岸老虎集聞前面槍礮之聲催促官兵趕緊進

發適賊人衝撲田家壩鄉勇卡座將欲搶渡小深河

臣等

督兵渡河衝上山梁兩路擊剿詎賊人自上下撲拋擲石

塊併力抗拒阿哈保達音泰等率馬兵首先衝殺佐領永

恪布驍騎校額勒錦藍翎領催連陞皆力戰被傷陣亡達
音泰所騎之馬被槍打傷該鎮復換馬趕上衆兵亦怒不
可遏一擁而進斃騎馬賊五名步賊十餘名賊人稍退劉
廷基張朋等亦帶兵追至前後夾攻殺賊百餘人生擒十
三名賊人向前敗走時已向晚不便窮追當令官兵在小
深河山梁暫駐以定縣城內外民心一面派守備馬應國
帶兵勇三百名緊跟賊蹤察看竄向何所相機進剿

諭曰明亮等所奏情形祇係截剿賊匪殲獲不過三百餘名賊匪
又向南敗走殊不滿意此次打仗時計吉林黑龍江勁兵尙未
到彼明亮等僅就原帶之兵分投截剿是以不加深責現在賊

匪由竹山小深河山梁向南敗走官兵是否可以兜截不致竄入竹谿一帶未據聲敘且姚之富等欲從幽僻小路竄往陝西白河是賊匪欲與前股楚匪合夥則官兵又成尾追之勢明亮等探明賊蹤務須逼向東趨歸入房縣山內以便擇要圍剿所有陣亡之佐領永恪布等俱著咨部加等議卹

二十七日

公偕明亮奏言賊匪自小深河敗竄後由麻家渡保豐一帶向西南奔突臣等沿途獲賊訊知賊人欲攻撲竹谿縣城奔入陝省十三日已竄至竹谿之水坪地方離縣治三十餘里而八月初間從竹山竹谿竄入陝境之另股賊匪

近復自白土關折回竹谿之西小河口一帶焚掠將欲竄合夾攻縣城查竹谿縣治係新修土城雖有守兵三百餘名鄉勇千餘名並無大員彈壓隨飛飭巴圖魯侍衛溫春阿納保等帶領馬隊兵丁繞道馳赴縣城防護安撫居民等漏夜帶兵由南山後趕進以期與阿納保等內外夾擊十四日五鼓行至漫液塘該處東離水坪十五里西距小河口三十里北至縣城十五里天明集兵臣等從黃龍寨青草坪分投迎擊適賊匪正由東西兩路分擾前來一見官兵西路小河口賊匪卽折回小關塘一帶奔逃東路水坪賊匪亦折向秦家坪寬坪一帶竄走官兵分投勦殺

賊匪越澗翻山狂奔亂竄西路之賊被副都統阿哈保副將扎勒杭阿等領兵追至敖家寨截殺百數十人生擒五名餘衆向關垵一帶疾竄東路之賊被興肇同達音泰等領兵追至椒嶺岡賊匪由鼓兒寺西逸臣等率鎮臣木騰額等帶兵繞出獨松寺山前橫衝截擊賊匪拋棄行李騾馱捨命遁逃官兵擊殺二百餘人生擒十四名奪獲馬騾器械甚多餘衆逃向店坪一帶查關垵以西係竹谿與陝西平利交界之地店坪以北係往陝省白河大路兩股賊匪今被官兵分投追剿雖已不能會合亦是牽綴官兵現在滿漢兵丁六千餘名不敷分路追剿竊計關垵一股之

賊有提督柯藩在平利八角廟堵截又有秦承恩截留新到之甘肅兵丁及恆瑞帶兵前來足資截剿其北面白河一帶經景安派王文雄帶兵一千名自北兜擊亦可無虞闌入惟該匪折向連線河北竄或店坪一股賊匪折向七里關大金河西竄則兩股賊匪仍得會合現在竄向店坪之賊尙在彼處屯聚臣等昨已趕到沈家營相離十餘里卽日整隊前進於兩股賊匪前竄必經之路扼要截殺務期以次遞剿至竹谿縣治周圍新築土城頗爲高厚城外有龍堰河廖家河兩道環衛所設兵勇逐加獎賞俱極奮勇向義居民亦已安堵

諭曰明亮等所奏擊退分擾竹谿賊匪情形所辦尙好但祇係沿途追剿並未獲一賊首而所殲賊匪亦不過二三百人未爲滿意賊匪東西奔竄忽分忽合意欲牽綴官兵冀圖他竄明亮等不可墮其奸計總當併力兜剿一股再辦一股以次肅清

二十八日

諭曰昨已有旨令勒保馳赴湖廣新任該督到彼楚省軍務自當令其董率辦理宜縣亦本係總統但現在勁兵健馬俱在明亮等一路且姚之富齊王氏尤爲賊首中緊要之犯此時所盼者惟明亮德楞泰二人捷報宜縣勒保雖係川楚總督亦斷不肯掣明亮德楞泰之肘伊二人不得因聞勒保現有到楚之信稍

存觀望儻不能卽將齊王氏姚之富拏獲而轉被他處殲擒則又將何顏對朕耶明亮德楞泰總當確探二首犯蹤跡專意設法擒獲不必分心他處爲要

十月初四日

公偕明亮奏言店坪一股竄匪聞官兵緊躡其後無處屯

紮卽行前遁

臣

明亮同興肇等由西面前進

臣

德楞泰率

侍衛溫春等由東面前進追至銅錢關地方適賊匪已將

鄉勇卡座衝開其前隊之賊竄越陝境七里營一帶後隊

之賊尙在該處焚掠

臣

等飭兵並進賊匪立卽狂奔當令

巴圖魯侍衛等飛騎由山後溝內抄上前面山垓攔截官

兵由東西兩面山梁壓下勦殺將留後賊人二百數十名
截住該匪猶捨命衝突官兵痛加圍勦殲戮無遺將被焚
房屋趕緊撲滅其前進之賊由七里關火金河向洵陽境
內疾竄臣等當卽率兵追殺該匪於山溝內曲折肆竄並
於東西四山焚燒多至一二十處意將牽制官兵不能定
其所向臣等詢明路徑專向賊人去路追擊其不通大路
處所令一二弁兵分帶鄉勇前往勦捕臣等追至董家營
大張溝賊匪復由洵陽邊界西竄將擾及興安聞惠齡恒
瑞慶成等自西鄉紫陽一路兜勦正期兩面夾擊詎官兵
行至四股堖此股賊匪已經恆瑞慶成等擊退翻山折竄

平利_臣等一面派侍衛溫春阿納保達爾精阿等帶兵四百名繞道抄赴平利縣城防護一面率兵取道高望廟星夜追剿二十二日該侍衛等馳抵縣城賊匪又竄至外西關焚掠該侍衛會同在城防守之佐領七十六督率兵勇排列槍礮轟擊斃數十人賊匪稍退西刻復又結隊前來大肆焚劫搶近城濠溫春正在奮擊_臣等趕至由後進攻賊始敗竄計斃賊三百餘人餘賊向西南逃遁時已夜深當在木瓜山停息片時一面將縣城內外人民招集安撫_臣亦卽探明所向漏夜追擊不與以暇查此股賊匪大半籍隸襄樊屢思竄回舊地今_臣等一路追剿又有賽沖

阿所帶吉林兵丁及景安所帶後起各兵自均州鄖陽一路前來該匪斷不能折回東竄楚境業已肅清獲賊方爲章等十三名俱係從賊打仗放火之賊訊明後當卽正法連日打仗傷亡兵丁另行查明咨部再查興安郡城爲漢江上下游總匯人民蕃庶江岸懸互渡口亦多雖有秦承恩在郡彈壓兵力無多署鎮田有成亦祇帶兵四百名當此數股賊匪奔竄無定之時不可不留大員帶兵守禦柯藩係固原提督興郡是其所轄臣等擬令原帶兵一千五百名在興郡防護以鎮民心其自紫陽以至興安沿江口岸俱責成該提臣同署鎮田有成督率兵勇往來巡查嚴

密防堵

諭曰明亮德楞泰已至洵陽七里關由東面會剿四路俱有官兵而賊匪又竄聚一處實屬極好機會現在吉林黑龍江官兵及察哈爾馬匹自己陸續到齊正當四面合擊將首逆悉數生擒明亮德楞泰務須倍加奮勉悉心布置

同日公偕明亮又奏言臣等追賊自楚入陝經過被擾之區村莊皆已焚燬蓋藏皆已劫搜男婦皆已擄脅情形可矜目不忍視此時已擾者急須撫卹未擾者尤宜隄防查各州縣在城之民城池足爲保障是以賊匪均不攻城其村落市鎮本屬散處僅恃一二隘口鄉勇防護或守望者

相離較遠猝然遇警不及應援或山路分歧有一二處設
堵未徧賊已闌入年餘以來百姓往往一聞賊至倉惶躲
避糧食衣物卽爲賊有其稍後者該匪旣劫其物并擄其
人甚至備衛之火藥器械反以濟賊而該匪每到一處有
房屋以棲止有衣食以接濟有勾結逼脅之人爲之引道
路而供負載是以自用兵以來所殺無慮千萬而賊不加
少爲今之計欲卹難民而困賊匪莫若飭有賊州縣於大
市鎮處所勸民修築土堡環以深濠其餘散處村落酌量
戶口多寡以一堡集居民三四萬爲率因地之宜就民之
便或十餘村聯爲一堡或數十村聯爲一堡更有山村爲

遠不能合併作堡者卽移入附近堡內所有糧食牛豕什物一併收入被難民人卽於其中安置搭蓋草棚賊近則令各戶壯丁更番守禦賊遠則仍不禁其出入俾得無誤耕作在民各保身家巡防自必奮勇壯丁不足更於難民中擇其驍健者充當鄉勇酌給口糧卽以代賑每堡派文武委員二三人紳士耆老七八人爲之董率彈壓如此防範未被難之戶得有捍禦已被難之民得謀食息且收養堡內之人戶口有稽不特可免流離抑且賑無冒濫又其中有一二小人曾經入教首鼠兩端者亦皆有所拘束不致附和勾結設賊匪竄至溝壘森嚴難以衝突矧各堡以

逸待勞併力抵剿賊匪處處受敵而人民不爲逼擄糧食
牲畜不爲搶奪火藥器械不爲掠取該匪將必飢餓窮蹙
料難仍前肆竄加以勁兵雲集併力兜擒定能按股殲除
臣等前在襄陽該處紳士梁友穀等亦築堡防堵賊匪屢
次攻撲不能進擾實有明驗是以現在飭令湖北之鄖陽
房縣竹山竹谿陝西之興安白河洵陽平利安康石泉等
處一律相地修築並移咨汪新秦承恩選派委員上緊妥
辦此外或有須籌防修築之處亦囑該撫臣暨地方官隨
時酌量情形一體辦理至於川省川東一帶每多險峻山
寨祇須令有賊處所居民移住山寨一如守堡之法共相

保護其大村鎮市不便挪移者則令仿照築堡似於禦賊安民之道均有裨益

案此卽堅壁清野之始議也

上以築堡煩民不如

專摘首逆遂未議發至六年始奉

旨通諭於是勸

保行之於川東川北那彥成松筠台布長麟行之於陝甘書麟吳熊光行之於湖北先後三四載堡寨告成而賊亦減云

初八日

公偕明亮奏言查勦辦賊匪官兵本宜合併但現在賊匪流竄無定官兵繞近旋即折竄若一處布置不嚴卽爲匪徒衝越兇截轉爲費力陝省平利安康紫陽一帶大山層疊與川東各郡縣無異賊匪現向山內竄匿官兵跟蹤搜

勦山崖險仄接踵以行若合兵一路進攻不但途中反爲擁滯儻賊匪西竄陝省一時已無可調之兵實難堵禦

臣

等體察情形現在

臣

等追擊一股竄匪已與前在白土關

柯藩擊退之賊會合雖人數較增於前但連日以來

臣

等

緊躡兜擊於小豐堽左落河等處屢有殺獲賊匪實已膽落現由八卦廟向西南山徑前竄以

臣

等原帶各兵合之

賽冲阿帶到吉林直隸山西各兵及續後來索倫等官兵已敷勦辦其自甄坪竄往苦竹關一股匪衆非折回川省大甯太平卽折回紫陽西鄉恆瑞慶成現在帶兵由川陝一帶邊界迎前截擊自可得手惠齡秦承恩將窺伺與

郡賊匪擊退後秦承恩仍赴郡城彈壓惠齡已帶兵由西
北托木溝一帶前進正可與臣等及恆瑞等合力兜剿但
三路跟蹤追擊前無攔截難保不又肆竄且查漢中一郡
東界西鄉紫陽西與川省保甯廣元等處接壤爲川陝門
戶又聞方山坪剿散竄匪擾及通江近臨保甯萬一北竄
漢中或闖入棧道所關匪細莫若令惠齡率同富成帶領
原帶兵三千餘名迅速赴漢中甯羌一帶堵剿則不獨已
通之賊北竄陝省得以迎頭截殺卽臣等與恆瑞等所剿
兩股竄匪或向前肆逸亦可由西面兜剿且就此時陝楚
蜀有賊地方情形而論漢江一帶爲陝楚豫三省保障今

自漢中以至襄樊楚有李奉翰張文奇陝有柯藩田有成帶兵堵截又有秦承恩在興郡防守往來策應江防已可放心惟漢中以西多與川省毗連堵剿未嚴恐賊匪將乘間竄入有惠齡帶兵前往扼要則東與柯藩一路西面與宜縣通巴一路皆可聯絡其通巴東南新開雲萬一帶則有舒亮木騰額穆克登阿等所帶官兵相應雲陽之東夔巫一帶則有觀成德齡等官兵相應接續夔巫巴歸一路又有額爾登保所帶之兵歸州東北則景安現由房縣竹山一帶前來聲援亦壯外圍周密賊匪不得乘虛肆竄臣等率領勁旅緊跟勦殺處處有兵攔截可無顧慮肅清一

處再行酌量情形將各路官兵緊逼移前次第圍剿似易得手再賽冲阿所帶吉林頭二起官兵並直隸山西兵一千名自襄陽均州竹谿一帶前來於二十七日已到軍營臣等得此生力勁兵惟有上緊籌剿

諭曰宜縣奏到賊匪滋擾巴州通江情形賊勢未免稍張及閱明亮等摺已令惠齡同富成帶兵三千名迅赴漢中甯羌一帶堵剿不獨巴通之賊北竄陝省得以迎頭截殺而明亮等所剿平利竄匪向西奔逸亦可兜剿稍釋塵懷明亮等運籌布置尙爲妥協

二十日

公偕明亮恆瑞慶成奏言查安康平利一帶數股竄匪先後由東西兩路分竄前來總思牽制官兵乘間北竄江岸經臣等分投截擊賊匪俱在西南一帶往返逃竄臣明亮德楞泰所追一股由八卦廟向曾家壩逃遁該處路徑紛歧初二日臣明亮同興肇等帶兵由西北山後抄出擊剿臣德楞泰同賽沖阿等帶兵由東北山後抄出截殺約定兩路官兵行至該處先在山後紮住察探賊人炊食歇息之時出其不意同時並進已刻官兵甫到旋據哨望兵丁稟報賊人分數股排列山前路口其餘俱在山田民房內或搜採包穀或揀柴炊爨並未聚集一處臣等各放號礮

從山後壓下賊人慌忙失措被戮二百餘名其排列路口之賊直前抗拒經吉林兵丁奮力擊射賊人抵敵不住反身疾走官兵追殺十餘里賊人俱向深林內竄逸該處林密山高路徑不甚可辨暫將官兵紮住次早會值雨雪遂獎勵各兵冒雪追至竹峪關地方斃賊三百餘人生擒四十一名訊係賊人戰手當卽分別斬梟餘匪俱向西南唐家坪竄走臣恒瑞慶成等所剿一股自蔣家坪敗竄後追向平利西南一帶官兵由蔣家坪取道東河女仙山一帶緊跟兜擊初三日行至金竹園地方探知賊人因雨雪在全山地方屯紮卽率領巴圖魯侍衛等帶兵繞道抄出賊

前攔頭進剿並於兩面溝內選派槍手設伏賊匪捨死衝

突官兵奮勇異常斃賊三百餘名該匪卽翻山旁竄臣恒

瑞等仍率兵力追賊人由百仞溝一帶奔逸初五日竄至

唐家坪地方與前股賊匪會合適兩路官兵先後趕至賊

匪狂奔向豐溪一路逃遁該處爲陝楚川三省交匯之所

臣等惟有趁此機會趕緊兜剿再臣等接宜縣來信稱方

山坪賊首冉文儒等率其餘黨竄入巴通境內與前由太

平敗回之徐添德等合夥以致巴州失守賊匪屯聚州城

復分股奔逃保甯廣元一帶臣等抽撥兵二三千名前

往協剿查保甯爲郡城重地廣元係入棧要道自應撥兵

速往應援前因方山坪賊匪竄近巴州與漢中甯羌接壤
曾經奏令惠齡率同富成帶兵馳赴堵剿今惠齡一路官
兵正在擊剿喫緊之際未便移兵臣明亮德楞泰一路官
兵亦難分往若僅令將領等官帶兵二三千名往援又恐
不能得力因思臣恒瑞慶成所剿股匪現已歸併一處毋
庸分路擊剿臣明亮德楞泰有兵九千餘名尙敷剿辦索
倫山東各兵猶可催調前進臣恒瑞慶成原帶兵四千餘
名擬卽由漢中一路前進與宜縣兩面夾擊又派撥新到
直隸兵五百名令副將德忠隨同馳往惟查程途不下二
十餘站行走未能十分迅速臣等因先傳知沿途聲言派

撥數萬勁兵漏夜進發以安漢中一帶民心俾賊匪聞風震懾至索倫各兵已自襄陽啟行來營業經知會景安會同烏爾圖那遜等督率由竹谿關垓一帶前來惟索倫各兵全資馬力賊匪現竄路徑皆係崇山峻嶺羊腸小道馬力殊難深恃且山深早寒現已雨雪交作路窄泥淤不能乘騎如以有用勁旅置之不得力之地陟險穿山致令疲乏轉爲非計計該官兵等此時不過至均房一帶莫若暫令在竹谿之保豐場地方駐紮以壯後路聲威預防賊匪折回楚省北竄江岸之路俟臣等緊追賊匪逼入一定去向卽行飛調前來則前後緩急皆有所恃

諭曰明亮等奏兩路官兵連日擊剿竄匪逼令併歸一夥及分兵應援川省籌布各路情形所辦尙合機宜又據奏恆瑞慶成帶兵前往漢中一路所辦亦好漢中甯羌廣元一帶已有英善保興赴彼今恆瑞等又帶兵四千名接續前往聲威更極壯盛

二十一日

諭曰昨明亮等奏因各兵俱到軍營楚北後路較單令黑龍江官兵暫留竹谿之保豐場駐劄固爲預防賊匪折回起見但賊匪旣向西南山內奔竄自係探聞勁兵接續到彼心懷畏懼未必敢再折回湖北卽令折回亦必由明亮左右經過且此項黑龍江勁旅素爲驍勇乃不以之打仗殺賊轉在後路閒駐豈非以

有用之兵置之無用之地究屬非策自應仍調赴軍前及鋒而用即使湖北邊界有需防守亦祇須酌量留駐儘足爲後路聲援不可以新調勁兵全置閒地著烏爾圖那遜等卽行帶領迅往軍營剿賊

二十六日

公偕明亮奏言賊匪自豐溪前遁後由界嶺鎮坪一路日夜狂奔臣等進至界嶺擒獲留後放火賊匪廖開梅等十七名審訊賊人所向知該匪欲由雞心嶺竄入大甯老木園合夥臣竊計雞心嶺之南卽入大甯地界飛飭該處鄉勇民人速將嶺北路徑一一挖斷使該匪勢必折回鎮坪

得以迎頭截剿遂率官兵趕緊進發初十日午刻行抵鎮
坪隨據探報賊匪已自雞心嶺折回在黑虎廟地方焚掠
臣正在發兵進攻未刻賊人衝突前來臣等同興肇襄冲
阿率巴圖魯侍衛帶吉林勁旅健銳營兵丁荊州滿兵隱
伏峽口對面山林迎擊派阿哈保溫春達音泰等分伏峽
口左右兩山夾攻賊人蜂擁而至臣等率兵迎頭衝下殺
賊甚多賊人勢將卻退復有穿紅掛一人飛馬趕上喝令
賊衆上前抗拒欲衝向西北一路前竄吉林兵勇氣倍增
槍箭連發該逆落馬墜崖人馬俱斃餘匪反身亂竄又經
達音泰等兩路截殺後隊之賊不敢救應前隊之賊不能

竄走自未至酉斃賊一千二三百名生擒七十一名餘匪
仍向黑虎廟逃竄察看賊情非東向西溝一路竄回竹谿
卽西向甘溝竄至安康紫陽當派侍衛墨爾歡保總兵長
春副將劉廷基等帶兵赴西溝截剿派侍衛阿納保西拉
布副將扎爾杭阿等帶兵赴甘溝截剿連夜抄道分往並
扮爲鄉勇誘賊前至十一日巳刻賊果奔往西溝直撲鄉
勇卡座墨爾歡保等率兵自卡內躍出奮勇攬殺殺斃三
四百人賊人敗退卽由西溝竄至甘溝時天色將暮該匪
欲行遁竄幸派往官兵早已伏列路口衝下撲剿斃賊二
百餘人賊人敗走是夜賊屯金竹壩臣等先因金竹壩西

南小樹河一路河小水淺可以淌渡派令總兵木騰額協
領德明泰明保等率吉林官兵撒拉爾回兵馳赴小樹河
及豎旗山扼剿午刻賊人果由金竹壩西奔一股撲犯豎
旗山兵隊一股向小深河逃竄木騰額等率兵分擊該匪
退而復上者四次經官兵壓剿殲斃及滾山落河者不下
五六百人至晚賊人退紮小深河西大樹河埡口該處兩
山壁立河岸偏窄進剿不得地勢不如逼向樹河口山溝
前後堵剿遂飭西溝甘溝兩路官兵追逼而進衆兵由樹
河口至豎旗山一帶分段設伏臣明亮率同阿哈保等帶
兵至石坂山爲一路臣德楞泰率同溫春等帶兵至樹河

口爲一路興肇賽沖阿達音泰木騰額長春各帶官兵在
三溪子一帶互爲聯絡十三日寅刻同時並進辰刻該匪
在大樹河垭口經西溝甘溝兩路官兵進剿前來直向樹
河口蜂擁竄突

臣

明亮率兵衝下擊其中堅

臣

德楞泰迎

頭攔截擊其首隊興肇賽沖阿達音泰等繼進將萬餘賊
匪截爲五股賊人彼此不能相顧官兵益形勇銳併力攔
殺積屍徧野賊人拋棄器械馬匹爬山思遁官兵矢石並
進擊墜多賊其滾坡逃出者約三千餘人涉水過河竄入
箐林者千餘人計自初十至十三日斃賊五六千人生擒
三百六十五名婦女幼孩一百八十六名口器械無數訊

據獲犯僉稱擊斃穿紅褂之賊係大頭人張士虎礮斃執
旗賊匪係大頭人李潮又刃斃偽副帥李得思俱令該犯
等指認確鑿至逃竄四千餘窮蹙之賊已星夜派委鎮將
分投搜捕臣等亦卽日帶兵追剿前進沿途掃蕩務期將
首逆各犯全獲其生擒各犯發縣審訊實係習教從逆抗
拒官兵者卽行正法其逼脅入夥及被擄日淺者分別保
釋撫卹官兵連剿四晝夜奮勇爭先實爲出力

諭曰明亮等奏到官兵圍逼竄匪情形此次截賊共五六千人生
擒三百餘名並擊斃頭人張士虎等三名所辦甚好明亮德楞
泰著各賞給鑲嵌寶石白玉帶板大小荷包興肇賽沖阿阿哈

保達音泰木騰額長春溫春著各賞給玉搬指大小荷包

十一月初五日

公偕明亮奏言賊匪在樹河口經官兵截殺捨命逃竄分三路狂奔欲使官兵不能併路追剿且皆山谷小道叢密深林據探路弁兵報稱賊人竄過後多於路口堆積木石攔塞復將澗道橋梁概行焚拆臣等察看路徑飭令將弁兵丁分路窮追并派餘丁三四十名在前開除道路搭蓋浮橋俾不致有阻滯自十四日以後賽沖阿長春扎爾杭阿等追剿由樹河口竄渡顯子城一股十五日追至平溪河賊人聞信急竄賽沖阿等復由嵐河老林至關江山跟

蹤截殺一百餘名搜獲三十七名將賊人逼向白沙河繳
子坪一帶鎮臣木騰額副將明善李文蔚等追剿由三溪
子翻山竄逃一股十七日追至魚洞子賊人見有官兵追
入避匿山溝林內幸其時積雪未融蹤跡可辨該鎮等認
明所在因山溝窄狹不便進攻當將兵丁分堵前後用槍
礮轟擊斃賊四五十名次日餘賊捨命衝出經該鎮等截
擊計斃賊一百數十名賊俱由日曬溪逼向繳子坪西遁
臣等同興肇達音泰副將德甯侍衛富僧德等先於樹河
口大樹河一帶逐一搜捕拏獲藏匿林洞內賊匪郭長志
等九十二名婦女幼孩二百四十六名口遂於十五日早

率兵追擊自打熊溪山頂竄走一股十七日追至華龍山探知賊人因山口陡窄兼多冰凌互相扶掖以行不能疾竄當於各營內選派奮勇官兵及屯土兵丁五百餘名各著草履多帶槍箭前驅追捕其餘官兵繼進策應該兵等連步直前自上壓勦斃賊百餘名傾跌墮崖者亦多官兵於十九日追至織子坪正值賽沖阿木騰額等兩路先後兜擊前來賊匪卽併一處前竄三路官兵亦卽會合臣等察量該匪行蹤飄忽官兵正恐轉落賊後且紫陽接壤川境不可不熟籌截擊先經知會烏爾圖那遜圖桑阿帶領勁兵由興安大路前赴紫陽一帶此時若能趕到正可迎

擊臣等由小鎮銀硃壩一路趕緊躡剿因恐大隊驟馱帳房經行山僻窄徑未免遲滯概令留後惟裏帶餼糧窮日前進以期迅速趕上痛加殲戮

諭曰明亮等於樹河口等處打仗得勝之後僅分路搜剿敗逃餘匪其賊首姚之富李全齊王氏究竟是分是合或已竄往何處摺內均未提及現在勁兵健馬俱在明亮等一路非如他處兵力較單尙可藉口全望伊二人直前進擊迅擒賊首若似此漫無主見惟事追剿餘賊使有用勁兵又致奔走疲乏豈不可惜明亮等屢次尙爲出力是以疊加恩獎今乃置正賊首於不問舍其所急圖其所緩處處爲賊人牽綴惟知隔數日以一奏塞

責大非朕屬望之意著傳旨嚴行申飭